

經典賞析：范仲淹《岳陽樓記》

劉衛林

先導閱讀¹

《郁文華章—中華文化學與教資源套》：「選篇分析」

<https://www.edb.gov.hk/attachment/tc/curriculum-development/kla/chi-edu/resources/secondary-edu/lang/culture/B014.pdf>

積學與涵泳—中學古詩文誦讀材料選編

https://www.edb.gov.hk/attachment/tc/curriculum-development/kla/chi-edu/recommended-passages/KS4_14.pdf

岳陽樓記 范仲淹

慶曆四年春，滕子京謫守巴陵郡。越明年，政通人和，百廢具興。乃重修岳陽樓，增其舊制，刻唐賢、今人詩賦於其上；屬予作文以記之。

予觀夫巴陵勝狀，在洞庭一湖。銜遠山，吞長江，浩浩湯湯，橫無際涯；朝暉夕陰，氣象萬千。此則岳陽樓之大觀也，前人之述備矣。然則北通巫峽，南極瀟湘，遷客騷人，多會於此，覽物之情，得無異乎？

若夫霪雨霏霏，連月不開；陰風怒號，濁浪排空；日星隱耀，山岳潛形；商旅不行，檣傾楫摧；薄暮冥冥，虎嘯猿啼。登斯樓也，則有去國懷鄉，憂讒畏譏，滿目蕭然，感極而悲者矣。

至若春和景明，波瀾不驚，上下天光，一碧萬頃；沙鷗翔集，錦鱗游泳，岸芷汀蘭，郁郁青青。而或長煙一空，皓月千里，浮光躍金，靜影沉璧；漁歌互答，此樂何極！登斯樓也，則有心曠神怡，寵辱皆忘，把酒臨風，其喜洋洋者矣。

嗟夫！予嘗求古仁人之心，或異二者之為。何哉？不以物喜，不以己悲。居廟堂之高，則憂其民；處江湖之遠，則憂其君。是進亦憂，退亦憂，然則何時而樂耶？其必曰：「先天下之憂而憂，後天下之樂而樂」歟！噫！微斯人，吾誰與歸！

¹ 請在講座前先閱讀教育局課程發展處中國語文教育組選編，古詩文誦讀材料內本篇簡介及注釋等參攷資料。

作者

《宋史·范仲淹傳》

范仲淹，字希文，唐宰相履冰之後。……晏殊知應天府，聞仲淹名，召寘府學。上書請擇郡守，舉縣令，斥遊惰，去冗僭，慎選舉，撫將帥，凡萬餘言。

仲淹為將，號令明白，愛撫士卒，諸羌來者，推心接之不疑，故賊亦不敢輒犯其境。……帝方銳意太平，數問當世事。……退而上十事：一曰明黜陟……天子方信向仲淹，悉採用之。

仲淹以天下為己任，裁削幸濫，考覈官吏，日夜謀慮興致太平。……僥倖者不便，於是謗毀稍行，而朋黨之論浸聞上矣。

會邊陲有警，因與樞密副使富弼請行邊。……攻者益急，仲淹亦自請罷政事。……以疾請鄧州，……徙青州。會病甚，請潁州，未至而卒，年六十四。贈兵部尚書，諡文正。

解題

《宋史·滕宗諒傳》

滕宗諒，字子京，河南人。與范仲淹同年舉進士，其後仲淹稱其才，乃以泰州軍事推官召試學士院。…元昊反，除刑部員外郎、直集賢院、知涇州。葛懷敏軍敗於定州，諸郡震恐，宗諒顧城中兵少，乃集農民數千戎服乘城，又募勇敢，諜知寇遠近及其形勢，檄報旁郡使為備。會范仲淹自環慶引蕃漢兵來援，時天陰晦十餘日，人情憂沮，宗諒乃大設牛酒迎犒士卒；又籍定州戰沒者於佛寺祭酌之，厚撫其孥，使各得所，於是邊民稍安。

御史梁堅劾奏宗諒前在涇州費公錢十六萬貫，及遣中使檢視，乃始至部，日以故事犒賚諸部屬羌，又間以饋遺遊士故人。宗諒恐連逮者衆，因焚其籍以滅姓名。仲淹時參知政事，力救之，止降一官，知虢州。……御史中丞王拱辰論奏不已，復徙岳州，稍遷蘇州，卒。

宗諒尚氣，倜儻自任，好施與，及卒，無餘財。所蒞州喜建學，而湖州最盛，學者傾江、淮間。有諫疏二十餘篇。

王闢之《澠水燕談錄》

滕子京謫守巴陵，治最為天下第一。

滕宗諒〈與范經略求記書〉節錄

竊以爲天下郡國，非有山水瓌異者不爲勝，山水非有樓觀登覽者不爲顯，樓觀非有文字稱記者不爲久，文字非出於雄才鉅卿者不爲著。

巴陵郡西跨城堙，揭飛觀，署之曰岳陽樓。不知俶落於何人何代。……去秋以罪得守茲郡，入境而疑與信俱釋。……又明年春，鳩材僱工，稍增於舊制。

恭惟執事，文章器業凜凜然爲天下之特望，又雅志有山水之好，每觀送行懷遠之作，未嘗不神遊物外而心與景接。矧茲洞庭、君山傑然爲天下之特勝，切度風旨，豈不欲摠遐想於素尚，寄大名於清賞哉？伏冀戎務鮮退，經畧暇日，少吐金石之論，發揮此景之美，庶俾漱芳潤於異代者，知我朝高位輔臣，有能淡味而遠託思於湖山數千里之外，不其勝歟？

謹以〈洞庭晚秋圖〉一本，隨書贄獻，涉毫之際，或有所助。干冒鈞嚴，伏增惶灼。

附 錄

舊題陳師道《後山詩話》

范文正公爲《岳陽樓記》，用對語說時景，世以爲奇。尹師魯讀之曰：「傳奇體爾。」傳奇，唐裴鉞所著小說也。

吳楚材、吳調侯《古文觀止》

岳陽樓大觀，已被前人寫盡，先生更不贅述，止將登樓者覽物之情，寫出悲喜二意。只是翻出後文憂樂一段正論。以聖賢憂國憂民心地，發而爲文章，非先生其孰能之？